



Syaaban masa perbaiki diri jadi insan cemerlang

Ummah teruja sambut Ramadan patut lupakan sengketa, tingkat ibadah



NIK SALIDA SUHAILA

Pensyarah Kanan
Fakulti Syariah dan
Undang-Undang
Universiti Sains
Islam Malaysia

Syaaban yang sudah melewati pertengahannya adalah bulan penuh keberkatan dan menyediakan peluang seluas-luasnya untuk kita melakukan kebajikan. Dengan memperbanyakkan amal ibadah kepada Allah SWT dan perbuatan baik sesama insan, umat Islam tidak sewajarnya meninggalkan Syaaban tanpa menghayati dan menghargai kelebihannya.

Syaaban sepatutnya dijadikan bulan percubaan untuk memperbaiki diri menjadi insan cemerlang sebelum tibanya Ramadan.

Sebahagian ahli hikmah pernah berkata: "Sesungguhnya bulan Rejab adalah kesempatan untuk minta ampun dari-

pada segala dosa, Syaaban adalah kesempatan untuk memperbaiki diri daripada segala macam cela dan Ramadan masa untuk menerangkan hati dan jiwa."

Tidak hayati Syaaban

Sering kali kita ketinggalan menghayati Syaaban disebabkan keterujaan menyambut Ramadan. Malangnya, apabila Ramadan bertandang, kita tidak dapat memanfaatkan bulan mulia itu sepenuhnya. Justeru, Syaaban adalah sebaik-baik masa untuk kita membuat persediaan.

Syaaban tahun ini, umat Islam diuji dengan jerebu. Udara berasap yang merebak ke seluruh negara adalah ujian buat kita. Terdapat sekolah yang ditutup dan dibatalkan pengajian serta aktiviti pembelajaran ditangguhkan akibat udara tidak sihat yang boleh mengancam nyawa.

Tahap kesihatan juga menurun selain terdapat anak kecil mula diserang penyakit batuk, demam dan sakit kepala. Kakitangan hospital pula perlu berkerja lebih keras untuk merawat pesakit. Itu semua sebahagian daripada 'jalan' ibadah kepada Allah jika menghadapinya dengan reda.

Pada bulan ini juga terdapat pelbagai

penyakit fizikal dan jiwa yang merebak disebabkan tipu daya dunia serta isinya. Di kala insan lain berusaha dan berdoa siang malam untuk memperoleh zuriat, ada pula yang dianugerahkan Allah cahaya mata tidak diingini, dibuang bagai sampah.

Lebih daripada itu, ada yang mengambil kesempatan menjadikan bayi tidak berdosa sebagai barangan jualan sehingga mengetepikan asal usul agama dan keturunan yang sudah tentu memporakperandakan nasabnya kelak.

Persediaan hadapi Ramadan

Sebagai persediaan menghadapi Ramadan yang menguji kesabaran serta keimanan, sewajarnya Syaaban dijadikan bulan untuk memperbaiki diri supaya menjadi insan cemerlang dan lebih baik daripada sebelumnya.

Jika pada Ramadan umat Islam wajib berpuasa sebulan lamanya, maka Syaaban diperbanyakkan amalan puasa sunat, lebih daripada kebiasaan. Ke-

sempatan ini juga patut diambil untuk melatih anak berpuasa sebelum mereka wajib melakukannya pada Ramadan nanti.

Begitu juga amalan sunat lain seperti bersedekah dan solat sunat. Syaaban yang penuh rahmat jangan dibiarkan pergi tanpa memanfaatkan isinya semaksimum mungkin. Tambahan pula, di ambang Ramadan, umat Islam mula membuat persiapan menyambut Aidilfitri, termasuklah mereka yang tidak bernasib baik.

Amalan bersedekah sedikit sebanyak meringankan beban golongan susah dan amat mengharapkan bantuan mereka yang berkemampuan. Sekurangnya apabila datangnya Ramadan, mereka sudah mampu mengukir senyum dan menunaikan ibadah wajib dengan hati yang tenang.

Tidak teruja meriahkan masjid

Qiamullail dan solat sunat di malam hari juga rutin umat Islam sepanjang Ramadan yang janggal jika ditinggalkan. Namun, ia sukar dilaksanakan kerana umat Islam di negara kita tidak begitu teruja memeriahkan masjid di waktu malam dengan amalan solat sunat seperti di Tanah Suci.

Amalan ini hanya banyak dilakukan di penghujung Ramadan, setelah umat Islam mula merasai momentum bulan mulia itu, sementara Syawal sudah pun hampir bertandang. Maka Ramadan berlalu lagi tanpa sempat beribadah sepuas-puasnya.

Sesungguhnya bulan Rejab adalah kesempatan untuk minta ampun daripada segala dosa, Syaaban adalah kesempatan untuk memperbaiki diri daripada segala macam cela dan Ramadan masa untuk menerangkan hati dan jiwa"

Justeru, menjadikan Syaaban yang masih berkaki ini latihan menghadapi Ramadan bakal menjelma sedikit masa lagi adalah sebaik-baik tradisi yang perlu dicetuskan setiap umat Islam. Waktu inilah, kita perlu melupakan segala sengketa dan sejarah silam yang tidak memberi kebaikan.

Marilah bersatu padu di bawah panji agama, memperbanyakkan amalan su-

dat dan sentiasa berdoa serta merapatkan diri dengan Yang Maha Pencipta supaya kita tidak terpinggir daripada golongan yang sentiasa mendapat perhatian serta kasih sayangNya.